
ЎЗЎВОНДА ТУМАН МАРКАЗИДАН 14 КМ УЗОҚЛИКДАГИ 35-СОНЛИ УМУМТАЪЛИМ МАКТАБИНИНГ ҚЎШИМЧА БИНОЛАРИ ФОЙДАЛАНИШГА ТОПШИРИЛДИ

Вилоят ҳокими Хайрулло Бозоров, вилоят секторлари раҳбарлари билан биргаликда Ўзёвон туманида бўлиб, ҳудуддаги янги ишлаб чиқариш лойиҳалари, барпо этилган ижтимоий объектлар, кичик саноат зоналаридаги мавжуд ҳолатлар билан танишди.

Дастлаб “Мустаҳкам дўстлик” МФЙ ҳудудидаги 35-сонли умумтаълим мактабининг туман прокурори ташаббуси натижасида ҳашар йўли билан қурилган қўшимча биноларининг тантанали очилиш маросими бўлиб ўтди. Унда қатнашган вилоят раҳбари янги бинони фойдаланишга топширилиши муносабати билан мактаб жамоасини, қишлоқ аҳлини муборакбод этди.

Аввалги ўқув биноси атиги 80 ўринли бўлиб, дарс машғулотлари икки сменада ташкил этилганди. Жорий йилнинг май ойида қурилиши бошланган ва 6 ойда барпо этилган 160 ўринли қўшимча бино фойдаланишга топширилиши натижасида дарслар бир сменада олиб бориладиган бўлди. Мактабда 192 нафар ўқувчига 24 нафар педагоглар таълим-тарбия бериб келмоқда. Эътиборлиси, мактаб қурилишига қарийб 1,5 миллиард сўмдан зиёд маблағ сарфланган бўлсада, унинг фақат 170 млн. сўми маҳаллий бюджетдан, қолгани эса тадбиркорларнинг ва маҳалла аҳлининг ҳомийлик маблағлари асосида амалга оширилди.

Вилоят ҳокими Хайрулло Бозоров туман марказидан 13-14 км узоқликда жойлашган ушбу маҳаллада истиқомат қилувчи оилалар фарзандлари қулай шарт-шароитларга эга бўлганлигини қайд этиб, қурилиш ишларига бош-қош бўлган барчага миннатдорчилик билдирди.

“Ҳаракат қилса, интилса, ҳамма нарсага эришса бўлади. Яқинда Президентимиз, сўнгги 5 йилдаги ютуқларимиз, эришган натижаларимиз ортидан халқимизда “Қилса бўлар экан-ку!” деган ибора пайдо бўлганини айтиб ўтдилар. Ҳақиқатдан ҳам, мана, Ўзёвонда ҳам қилса бўлар экан-ку”, - деди вилоят раҳбари.

Шундан сўнг рамзий лента қирқилиб, меҳмонлар бино ичида яратилган қулайликлар билан танишдилар. 9 та синф хонаси, ўқитувчилар хонаси ҳамда компьютер синфи замонавий мебель ва зарур ўқув жиҳозлари билан таъминланган.

Шу куни меҳмонлар иштирокида мактаб ҳовлисида республикамызда давом этаётган “Яшил макон” умуммиллий лойиҳаси доирасида дарахт кўчатлари ҳам экилди.

Бизни ижтимоий тармоқларда кузатинг [Facebook](#),
2021-12-01 19:44:33